

Asuhan Budi di dalam Islam

ADAT DAN SOPAN SANTUN

(II)

Dalam bahagian yang kedua ini- bahagian penutup, Tuan Abdul Hamid mengupas dengan lebih luas soal kesopanan dalam masyarakat dan segala yang bertali dengan soal pergaulan yang terpuji.

(Oleh : Abdul Hamid, Parit)

Kesopanan di dalam masyarakat

Dengan kata mesyarakat ini tiadalah berapa jauh
bezanya dengan tujuan jiran yang telah lalu itu hanya
berbeza tentang luas maksudnya dan berlain-lain tempatnya.

Selain daripada masyarakat tiada kurang mustahak disebut
sosial ertinya percampuran ramai atau pergaulan
bersama-sama manusia. Dahulu perkataan ini disebut
ijtima'i, tetapi ertinya satu sahaja. Manusia dengan
masyarakat sangat-sangat mustahak selagi nyawa dikandung
badan. Masyarakat itu pada permulaannya dirumah, kedua
perkumpulan ramai (di majlis) dan lain-lain. Pada kedua-dua
tempat inilah (perkumpulan dan majlis) kelak teruji
dan terduga emas atau tembaga, teras atau empulur
seseorang baik pun dari tuturkatanya, baik pun dari
tingkah lakunya.

Sesungguhnya tiap-tiap seorang itu tiada boleh
hidup berasing, menunggal sebatang ke arah selama-lamanya
walau macam mana besar dan kayanya, melainkan semakin tinggi
darjah hidup seseorang semakin banyak kemahuannya, sebab

orang yang dipandang hina pada hari ini akan berguna
pula pada esoknya. Pekebun yang dilipat pakaianya camar
itu tanaman-tanamannya amat berguna kepada segala masyarakat manusia.
Oleh itu ada perbilangan orang-orang tua:

Si buta pengabus lesung.
Si bisu penghalau ayam.
Si pekak pembakar meriam.
Si pekung penjemuran.
Si kurap membakul buluh.

Sesungguhnya kata-kata ini tajam ertinya dan tepat
maknanya di sisi mereka yang siuman.

Di penceraian ini dibahagikan dengan dua bahagian:
Ziarah. Rumah tangga ialah jambatan masyarakat
yang pertama. Yang berkehendakkan dengan masyarakat rumah tangga
di sini bukanlah antara suami isteri dan dengan
keluarga sendiri sahaja melainkan dengan melawat-lawat
atau sahabat handai sentiasa datang melawat ke rumah
seseorang kerana sesuatu hal. Orang-orang Melayu ada
berapa adat dan peraturan bahari yang sangat megah

tetapi hampir-hampir telah mati atau hilang oleh remaja belia zaman ini tidak mengetahui langsung hingga mereka langgar dan landa! Dari hari ini patutlah bersama-sama mereka pulih dan hidupkan semula cara menziarah itu.

Jangan bersiul dan menyanyi masuk ke dalam kampung, kerana perbuatan yang demikian itu “harimau ganas”, tujuannya datang bala besar atau fitnah. Kalau bersiul di dalam ada ditelabikan “ular masuk rumah”. Maksudnya membawa pesona.

Jika tiba di halaman dipantang naik terus ke rumah melainkan diseru tuan rumah iaitu pinta izin hendak bertamu bahkan di dalam Islam diperintah memberi salam kepada tuannya yang demikian bererti mengamalkan firman Tuhan, Melayunya: “Hai segala mereka yang beriman jangan kamu masuk ke dalam rumah yang bukan rumah kamu, hingga pinta izin dan kamu memberi salam kepada ahlinya.” Setelah selesai daripada memberi salam sekiranya tiada izin oleh tuan rumah kerana sesuatu hal janganlah kita salah sangka melainkan undurlah kita dari situ.

Walaupun dibenarkan tetapi tuan rumah itu hanya perempuan yang bukan muhrim, kita memadailah tegak dihalaman sahaja ataupun masukkan separuh badan dimuka pintu supaya terelak daripada sompong kemudian keluarkanlah hajat kedatangan kita dengan ringkas: Adapun masa mengeluarkan perkataan itu hendaklah tunduk. Beginilah adab yang manis dan molek, hal yang demikian menyimpangkan fitnah.

Di dalam zaman kebesaran Melayu dahulu : adat menjemput sahabat handainya kepada majlis kenduri

terutama mengkhatakan anak, ibu bapa si anak itu sendiri mendatangi ke rumah tauilan yang rapat atau karib atau ke rumah orang yang seumur dengannya lebih-lebih ke rumah orang tua daripadanya. Peraturan itu bererti menghormati mereka itu lagipun supaya mereka itu tidak meringan-ringankan jemputannya. Melainkan jiran-jiran atau saudara mara yang lain diwakilkan siapa yang setara dengannya.

Adat seperti di atas telah beransur-ansur berubah lebih kurang 40 tahun dahulu. Perubahan ini pun baik dan molek iaitu dengan memakai “poskad”. Asalnya dimulakan di pekan-pekan sahaja. Pada zaman dahulu wakil-wakil yang datang menjemput mereka yang dihajatnya menggelek tepak sireh yang sudah berlipat. Sireh itulah disampaikan kepada tuan punya sambil berjabat tangan supaya menunaikan maksudnya. Sekiranya ahli rumah itu tiada, maka sireh itulah diamanahkan kepada anak isteri tuan rumah itu, maksudnya ganti batang tubuhnya.

Pelawat-pelawat setelah tiba ke rumah yang dilawati, ia akan ditempatkan pada tempat yang sesuai. Di dalam peraturan ini ada beberapa adab yang halus:

- 1: Jangan diliarkan mata mendonggak sesuatu yang menarik hati.
- 2: Jangan menggelisah.
- 3: Jangan bertanya harga mata benda yang diperkenan jika terpaksa jua tanyalah dengan sendirian: Umpamanya sekarang tidak ada barang-barang yang murah.
- 4: Tiap-tiap berbual atau berlabun jangan dibesarkan suara istimewa ditegah tertawa walaupun perkara yang menggelikan hati.
- 5: Jimat cermat masa mengeluarkan tiap-tiap perkataan, bukan yang cemar-cemar lebih-lebih di rumah yang ada perawan.
- 6: Waktu merokok usah dipentingkan habuk rokok itu merata-rata

kecuali pada tempat yang disediakan kalau tak ada buatlah cara yang sempurna demikian jua puntung rokok itu jangan sekali diselitkan di celah-celah dinding atau di bawah-bawah hamparan kelak merosakkan keelokan rumah itu. 7: Apabila sempurna hajat seharusnya kita pinta diri bermohon pulang supaya tidak membosankan tuan rumah itu atau terganggu ia. Di negeri-negeri barat konon pelawat akan diberi isyarat dengan membuka pintu supaya ia pulang. 8: Tuan rumah bagi menghormatkan pelawat itu sewajibnya mengalu-alu ia hingga ke tangga dengan mengucapkan selamat jalan. 9: Semasa melawat sahabat handai, walan, kenalan, kaum kerabat atau lain-lain yang jarang-jarang bertemu atau yang jauh-jauh adalah manis sekali jika dapat membawa “buah atau bunga tangan” istimewa rumah yang dilawati ada kanak-kanak sebagai tanda kasih mesra ataутambatan muhibah yang tulus ikhlas. 10: Adat zaman sari ini sesungguhnya sampai sekarang masih hidup dan berkesan di antara orang-orang perempuan mereka tidak sahaja menuaikan jemputan majlis kenduri tetapi dengan membawa beberapa hadiah yang sesuai dan selayak apatah lagi ke majlis kahwin yang dinamakan “cenderamata” (tanda hidup) begitu jua jika mereka melawat seseorang rakannya yang baharu menzahirkan anak sekali-kali tidak kecundang daripada memberi persalin baik pun kepada buah hati itu, baik pun kepada ibunya. Dari sinilah terbitnya perkataan Melayu “bersalin” ertiannya beranak. Biasanya masa yang selalu diberi hadiah itu di dalam tempoh si ibu itu di dalam pantang; tetapi adat yang betul sekali minggu yang pertama mahal peluang ziarah berduyun-duyun. 11: Membelah rumah, hal ini khas kepada perempuan-perempuan sahaja. Bagi menyambung pecahan yang keenam pada penceraian keenam yang telah lalu diterangkan di sini apakah dia pembelah rumah itu? Orang-orang perempuan dipanggil orang dapur dan dari dapurlah mereka memasuki rumah, demikian jua dari

dapurlah juga masa mereka pinta diri hendak pulang - jika mereka keluar dari lain pintu menjadi tegah pejatian bangsa Melayu, kelakuan yang begini dinamakan “membelah rumah” dan tiada berkesopanan. Orang-orang tua tersangat cemburu dan pantang larang yang keras tentang ini terutama di rumah-rumah yang ada anak perempuan oleh sebab kerap kali berlaku ayam di taman disambar hilang. Sebagai lagi sangat-sangat tiada disetuju dan digemar pelawat-pelawat perempuan memasuki rata-rata bilik-bilik rumah taulannya yang dilawatinya itu, mereka bimbang dan khuatir boleh jadi terbit apa-apa bencana dan pesona, kecuali dibawa oleh tuan rumah. 12 : Ada suatu kesopanan lagi yang tak boleh diringankan oleh pelawat lelaki dan perempuan masa melawat sesebuah rumah; jika pelawat lelaki di dalam adat Melayu jati yang belum bercampur aduk dengan adat dagang tentunya sangat-sangat masuk ke rumah yang didatangi itu dari hadapan. Berlainan dengan perempuan dilazimkan dari belakang ertiannya dari dapur. Sebab itulah dibahagian 11 yang di atas bila ditanya kepada tuan rumah: Apa orangnya (budaknya) si anak itu bersalin? Biasanya didengar jawapan “orang dapur” jika perempuan dan “orang bali” jika lelaki.

Majlis: Perkataan majlis ini telah sedia diketahui orang, ertiannya tempat duduk beramai-ramai lagi teratur. Meskipun majlis itu ada banyak namanya, tetapi di sini tidak ada maksud dituliskan satu persatunya. Bila seorang dijemput hadir ke mana-mana majlis wajiblah ia, 1: Menempatkan masanya supaya tuan rumah atau ketua majlis tidak tertunggu-tunggu akan mereka yang ketinggalan itu, yang kelak memuramkan majlis yang tersebut. 2: Pilihlah tempat yang padan: muda sama muda, yang tua sama yang tua tetapi tidak mengapa dan tidak janggal jika ada sesuatu hajat ketua majlis itu menjemput kepada sesuatu tempat yang tertentu (khas). 3: Walaubagaimanapun seseorang menepati

masanya bagi menghadiri majlis itu tetapi jarang sekali dapat sederap tiba, melainkan tak dapat tiada ada yang terkemudian. Jadi mereka ini dituntut bukan sahaja memberi salam kepada hadirin tatkala masuk majlis itu tetapi mesti dengan hormat santun- hormat dan santun yang berlebih-lebihan tiada dikehendaki hanya sederhana iaitu dengan condongkan badan ke hadapan istimewa di hadapan orang tua-tua. 4: Dalam majlis itu sayugianya jangan banyak berbual yang hina-hina dan suka berceloteh lamun dilakukan jua tetaplah sindiran pantun ini mengenai si celoteh itu: hilang sepuh tinggal senam-baharu tahu emas tak baik. 5: Jangan berbisik-bisik sesuatu perkara di majlis walaupun yang dibisikkan itu tidak mengenai ramai. Kelakuan berbisik-bisik itu dengan seboleh-bolehnya dijaga supaya tidak mendatangkan salah sangka kepada ramai. 6: Adab berkata-kata. Orang yang berakal tahu ia membuka mulut mengeluarkan percakapan

tidak yang sesia, yang mudarat dan yang hina melainkan yang manfaat, kalau dicuba juga boleh jadi datang gelisah mereka yang sekedudukan di situ. 7: Jangan berkata-kata sebelum habis perkataan taulan kita atau sebelum sampai masanya. Lagipun jangan berpanjang-panjangan bagi memjemukan pendengar kecuali dengan kegemaran mereka. 8: Semasa giliran taulan kita berkata-kata juga kita hadapkan kepadanya dengan tenang mendengar segala perkataannya. Jika ada sesuatu hal terkhilaf perkataan taulan kita usah dicelah tengah ia berkata-kata itu melainkan setelah selesai. 9: Mana-mana perkataan-perkataan yang didengar jika tidak munasabah jangan dibohongkan; tetapi hendaklah ditolak dengan adab tutur yang manis sekurang-kurangnya dikatakan ; “barangkali tidak begitu”. 10: Selain daripada yang di atas sekali-sekali tak boleh disampuk dengan pertanyaan seorang kepada orang lain sekalipun kita ketahui barang yang ditanya itu.



Pengenalan: Duduk nombor lima dari kanan ialah saudara Rusdi Kassim, Ketua Umum Pelajar Islam Indonesia, daerah Palembang, dan dikanannya saudara Rawi Hadis Darul Khatani, ketua umum pelajar Islam Indonesia, daerah Jakarta, bergambar ramai dengan pengurus-pengurus majlis syarahan yang telah diadakan keraiannya pada 30 Disember 1956 yang dianjurkan oleh “Ikhwan”.